

27/07/1998

IMF: Jakarta wajar contohi KL

Mohd Shah Abdullah

KOTA BHARU, Ahad - Indonesia patut mencontohi langkah Kerajaan Malaysia yang tidak memohon bantuan daripada Tabung Mata Wang Antarabangsa (IMF) bagi memulihkan keadaan ekonomi berikutan kegawatan ekonomi di rantau ini.

Ketua Umum Muhammadiyah, Dr Amien Rais, berkata adalah jelas badan dunia itu tidak komited untuk membantu Indonesia, sebaliknya gagal menunaikan janji untuk menghulurkan bantuan sewajarnya.

Menurutnya, IMF jelas menjadi ejen menyebarkan dan mengembangkan amalan kapitalisme dalam sistem ekonomi di seluruh dunia, bukan untuk membantu memulihkan keadaan di sesebuah negara.

"Saya sudah membuat kesimpulan IMF sebenarnya tidak serius membantu Indonesia. Malah pemerintah Indonesia sepatutnya mencontohi Malaysia yang mengucapkan 'Selamat Tinggal' kepada IMF," katanya.

Beliau berkata demikian ketika menjawab pertanyaan seorang peserta pada Persidangan Antarabangsa Mengenai Kashmir dan Palestin, anjuran Lajnah Antarabangsa Pas Pusat dengan kerjasama Pas Kelantan, di sini, semalam.

Beliau diundang menyampaikan ceramah bertajuk Indonesia Era Pasca Reformasi bersama beberapa pemimpin gerakan Islam antarabangsa dari Kosovo, Kashmir dan Palestin.

Sebelum ini, Perdana Menteri, Datuk Seri Dr Mahathir Mohamad dan Timbalannya, Datuk Seri Anwar Ibrahim kecewa dengan sikap IMF yang gagal menghulurkan bantuan kepada Indonesia, sebaliknya bertindak cepat untuk membantu Russia yang menghadapi masalah.

Dr Amien berkata, fungsi badan kewangan antarabangsa itu memerlukan kajian semula, selepas ia terbukti gagal menjalankan tanggungjawab bagi menghulurkan bantuan khususnya di kalangan negara membangun yang menghadapi masalah kegawatan ekonomi.

Menurutnya, sebagai langkah pemulihan, Indonesia seharusnya memberi tumpuan kepada pengukuhan ekonomi domestik termasuk memantapkan kedudukan sektor pertanian.

Mengenai perkembangan Islam, pemimpin reformasi Indonesia itu turut memuji kebijaksanaan Malaysia yang walaupun hanya mempunyai kira-kira 60 peratus penganut beragama Islam, berjaya memartabatkan Islam sebagai agama rasmi dalam Perlembagaan Negara.

Beliau berkata, walaupun Indonesia mempunyai kira-kira 200 juta penduduk dengan lebih 90 peratus beragama Islam, dasar yang sama tidak dapat diletakkan dalam Perlembagaan Negara yang berasaskan Pancasila.

Ditanya kedudukan Aceh yang menuntut kemerdekaan sebagai wilayah Islam, Dr Amien berkata, beliau tidak menyokong langkah mana-mana wilayah di negara itu berpisah dengan Jakarta, sebaliknya harus kekal dalam satu entiti yang kukuh.

"Cuma wilayah seperti Aceh harus mempunyai autonomi termasuk menerima bantuan kewangan dari Pusat dan tidak harus dipinggirkan," katanya.

Beliau juga optimis dengan kepemimpinan Presiden B J Habibie untuk membawa Indonesia ke arah yang lebih baik dan menyifatkannya sebagai seorang yang mempunyai 'hati nurani'.

(END)